

## এসএসসি পরীক্ষায় নজিরবিহীন নকলের ধারা অব্যাহতঃ কেন্দ্রে কেন্দ্রে সন্ত্রাস সংঘর্ষ

স্টাফ রিপোর্টার : এসএসসি পরীক্ষায় নজিরবিহীন নকলের ধারা অব্যাহত রয়েছে। সেই সাথে কেন্দ্রে কেন্দ্রে নকলবাজ ও তাদের সঙ্গীসাধীদের সন্ত্রাস-সংঘর্ষ চলছেই। কোন কেন্দ্রেই জারিকৃত ১৪৪ ধারা পালিত হচ্ছে না। গতকাল বরিশালে নকলের দায়ে বহিষ্কৃত একজন পরীক্ষার্থী বাবুগঞ্জ কেন্দ্রে ঢুকে টিএনওকে ছুরিকাঘাত করে পালিয়ে গেছে। অপরদিকে লক্ষ্মীপুরে টিএনও একজন পরিদর্শক শিক্ষককে প্রহার করেছেন বলে অভিযোগ পাওয়া গেছে এবং অপর একজন শিক্ষককে পুলিশ গ্রেফতার করেছে। শাহজাদপুরে ম্যাজিস্ট্রেট প্রহার এবং সংঘর্ষের পর আজ থেকে সেখানকার পরীক্ষা কেন্দ্রে বিডিআর মোতায়েন করা হচ্ছে। গতকাল সকালে হিসাববিজ্ঞান ও বিকেলে কম্পিউটার শিক্ষা কর্মমুখী শিক্ষা আরবী, সংস্কৃত, পালি, চারু-কাককলা, বেসিক ট্রেড প্রভৃতি বিষয়ে এবং দাখিল পরীক্ষায় সারাদেশে নকলের দায়ে সব মিলিয়ে সহস্রাধিক পরীক্ষার্থীকে বহিষ্কার করা হয়েছে বলে জানা গেছে।

গত রাতে পাওয়া সর্বশেষ খবরে জানা গেছে, রাজশাহী বোর্ড কর্তৃপক্ষ নজিরবিহীন নকল ও সন্ত্রাসের কারণে সিরাজগঞ্জের শাহজাদপুর পাইলট হাই স্কুল ও শাহজাদপুর সরকারী কলেজ কেন্দ্রে দুটি আজ (বুধবার) থেকে বাতিল ঘোষণা করেছেন। সংশ্লিষ্ট পরীক্ষার্থীদের সিরাজগঞ্জ সরকারী কলেজ কেন্দ্রে অবশিষ্ট পরীক্ষা নেয়া হবে। বরিশাল ব্যুরো জানায়, নকলের দায়ে বহিষ্কৃত একজন পরীক্ষার্থী গতকাল থানা নির্বাহী কর্মকর্তাকে ছুরিকাঘাত করেছে। বাবুগঞ্জ থানা সদরের খানপুরা দাখিল পরীক্ষা কেন্দ্রে অসদুপায় অবলম্বনের দায়ে প্রথম দিনেই বহিষ্কার হয়েছিল জনৈক আল-আমীন। গতকাল (মঙ্গলবার) তার বোন আখি বেগম লিপিকেও অসদুপায় অবলম্বনের দায়ে বহিষ্কার করার পরে আল আমীন প্রতিশোধ পরায়ন হয়ে থানা নির্বাহী কর্মকর্তা আহসান উল হক-এর ওপর ছুরি নিয়ে হামলা চালায় কেন্দ্রটিতে ঢুকে। তবে এতে টিএনও অস্ত্রের জন্য রক্ষা পেয়েছেন। তার জামাকাপড় ছিঁড়ে গেছে ধস্তাধস্তিতে।